

## ※持戒

—出自《寒笳集》—

【願文】稽首大慈悲，救護末劫者。我念末劫苦，破戒為第一。我思救苦方，無越毘尼藏。毘尼若住世，正法永不滅。行成果斯尅，教不屬空言。或因持戒力，速成淨滿尊。或因淨尸羅，嚴淨諸佛土。或因別解脫，作獨覺聲聞。或因善戒力，生禪及天道。亦作人中勝，福樂好名稱。如是差別果，皆由戒所得。近果說差別，究竟歸一乘。如是勝妙法，願為我昭明。普度長夜中，無依無怙眾。(下略) 卷一之一·一九後

## ※念佛

—出自《西方徑路》清·古崑法師—

「徑路策進：

一句阿彌陀。徹底悲心說。聞此難信法。當願生彼國。  
一句阿彌陀。壽命不思議。及其諸人民。一切皆無異。  
一句阿彌陀。無量功德力。大石置船上。必定不沉溺。  
一句阿彌陀。罪除無量劫。聞名尚離苦。何況憶念切。  
一句阿彌陀。末法緣最深。餘行難成就。唯此獨超倫。  
一句阿彌陀。諸佛異方便。欲生安養國。應當專心念。  
一句阿彌陀。千經萬論宣。彼佛與我等。宿有大因緣。  
一句阿彌陀。慧遠知幽玄。功高極易進。念佛最為先。  
一句阿彌陀。蓮池具正見。臨終垂慈誨。只要老實念。  
一句阿彌陀。神力不可測。八哥稱佛名。皆生極樂國。

## ※公案

《王日休居士略傳》：

王日休，字虛中，龍舒人（今江西吉水縣）。宋、國學進士，棄官不就，專修淨業。布衣蔬食，日課千拜。著《龍舒淨土文》十卷行世，普勸修持，導引咸修淨土。將卒前三日，徧別道友，勗以精進。及期，禮誦如常。至三更忽勵稱佛數聲，唱言佛來迎我，屹然立化。其詩曰：

五更報曉莫貪眠 抖擻精神向佛前 一拜一聲彌陀佛 西方早種一枝蓮」

## ※公案

《周夢顏居士略傳》：

周夢顏一名思仁。字安士。崑山諸生。博通經藏。深信淨土法門。自號懷西。嘗以眾生造無量罪。唯淫殺居半。因著戒殺書名《萬善先資》。懇切深痛。其戒淫書。名《慾海回狂》。斷淫窮源。又輯勸修淨土書四卷。名《西歸直指》。又著《陰隲文廣義》三卷。引入出世法門。乾隆四年正月。與家人訣云。將西歸。請以香

湯。卻之曰。我香湯沐浴久矣。談笑而逝。異香滿室。年八十四。其勸世歌曰。今日奔馳。明日奔馳。忙忙碌碌何日住。使盡心機。結盡冤讐。總為妻兒作馬牛。妻兒是主我是奴。一逢使喚便奔波。妻兒是鎖我是囚。去去來來不自由。妻兒是繭我是蠶。被他裹住受辛酸。妻兒是井我是雪。只待填滿方休歇。世間多少烈丈夫。往往甘受妻兒苦。究竟妻兒何所用。生死分途不相共。不知撐開眼。看破娑婆險。不如用著力。快與魔王敵。阿彌陀。是我父。早辦慈心來救我。阿彌陀。是我母。早有法乳來養我。安養國。是我宅。黃金為地真難得。蓮花臺。是我胎。七寶為座佛持來。不須弄智巧。不要費錢財。只須口口是彌陀。念念在菩提。要往生。原容易。佛既提攜我。我學佛提攜。四恩三有盡回施。八難三途皆沾濟。將此西方九品蓮。處處栽培盡大地（此歌見古今禪錄）」